



Vischnaunca
Tujetsch

Protocol dalla radunonza da vischnaunca

dils 9 d'avrel 2021

allas 20.00 uras ella halla plurivalenta Dulezi a Sedrun

Protocol dalla radunonza da vischnaunca dils 9 d'avrel 2021 allas 20.00 uras entochen allas 22.00 uras, ella halla plurivalenta Dulezi a Sedrun

Presidi: Martin Cavegn (president communal)

Actuar: Simon Collenberg

Dumbravuschs: Patric Deragisch e Simon Beer

Presents: 56 (inclus suprastonza ed actuar)

Perstgisas: Sabrina Flepp-Loretz

Tractandas

1. Avertura
2. Protocol dils 18 da december 2020
3. Contribuziun annuala (garanzia da deficit) en favur dalla Residenza Dulezi SA
4. Lescha dalla vischnaunca Tujetsch davart susteniments finansials per interpresas pertuccadas dallas prescripziuns relaschadas en connex cul coronavirus
5. Visada dils contracts pertuccont il sittar ella Val Maighels
6. Orientaziuns
7. Varia

1. Tractanda Avertura / Beinvegni

Il president communal Martin Cavegn fa in cordial beinvegni a tuttas Tuatschinas ed a tuts Tuatschins, als commembers dil cussegl da vischnaunca ed als commembers dalla cumissiun da gestiun alla tiarza radunonza da vischnaunca dil trienni 2020/2023.

Il president communal constatescha che la radunonza ei vegnida convocada tenor las prescripziuns dalla constituziun communal, artechel 30, cun la publicaziun ellas Tuatschinas nr. 06 dils 26 da mars 2021 e nr. 07 dils 9 d'avrel 2021 sco era sin la pagina d'internet dalla vischnaunca. Ultra da quei seigi vegniu repartiu in messadi en mintga casada.

Ils posts sco dumbravuschs sorprendan Patric Deragisch e Simon Beer.

Las votaziuns vegnan per ordinari fatgas cun maunpli. Tier las votaziuns cun maunpli ei la pluralitad da quels che voteschan decisiva, ein las vuschs ulivas ei la damonda renviada. Ina quarta dils votants presents san pretender scrutini.

Tenor art. 31 lit. i dalla constituziun communal ha la radunonza da vischnaunca la cumpetenza da suttametter las fatschentas alla votaziun all'urna. La pluralitad da quels che voteschan ei decisiva.

2. Tractanda Protocol dils 18 da december 2020

Martin Cavegn, president communal:

Il protocol ei staus publicaus el fegl official dalla vischnaunca "La Tuatschina" nr. 01 dils 15 da schaner 2021. Per quei motiv proponel jeu da desister da preleger. Neginas protestas ein vegnidas inoltradas, aschia ch'il protocol ei approbaus.

3. Tractanda Contribuziun annuala (garanzia da deficit) en favur dalla Residenza Dulezi SA

Presentaziun dalla tractanda entras Martin Cavegn, president communal:

Ils 23 da zercladur 2017 ha il pievel approbau il project dalla Residenza Dulezi, contribuì ina summa da frs. 2.9 milliuns per la construcziun digl object e concediu ina garanzia pil capital jester restont. La vischnaunca ha ultra da quei signau tier la Residenza Dulezi SA in capital d'acziun da frs. 95'000.-. Medemamein ha il pievel concediu in dretg da baghegiar independent e cuzzont per in spazi da 50 onns alla Residenza Dulezi SA. La construcziun dalla Residenza Dulezi ha custau en tut frs. 9.3 milliuns (inclus la garascha).

Ils 10 da fenadur 2020 ha la radunonza communal approbau l'adattaziun dalla finanziaziun tier il project. Aschia vegn la construcziun dalla garascha e digl entir secund plaunterren da niev finanziada entras la Residenza Dulezi SA e s'auda era a quella societad. Ils cuosts persunter muntan a frs. 871'191.-. Sin fundament da quella midada eisi stau necessari d'adattar il dretg da baghegiar per la Residenza Dulezi SA.

El rom dall'elavuraziun dil preventiv per la Residenza Dulezi havein nus fatg persenn che la societad ei avisada sin sustegn finanziel dalla vischnaunca. Il cussegl d'administraziun dalla

Residenza Dulezi SA ha previu da scriver giu il baghetg eifer in spazi da 50 onns, pia annualmein cun frs. 181'248.- (*frs. 9 milliuns / 50 onns*). Il resultat da fatschenta (cashflow) tonscha buca per far quellas amortisaziuns necessarias. Ord quei motiv ei la Residenza Dulezi SA avisada sin ina contribuziun annuala dalla vischnaunca. Quella contribuziun da rodund frs. 100'000.- possibilitescha alla Residenza Dulezi SA da curclar las amortisaziuns menziunadas. Sin fundament dallas entradas actualas ei la Residenza Dulezi SA numnadamein buca habla da finanziar quellas amortisaziuns. Actualmein muossa la Residenza Dulezi SA in gudogn da frs. 80'000.-. Priu il cass ch'ella stuess curclar las amortisaziuns da frs. 181'248.-, seresultass ina sperdita da rodund frs. 100'000.-. La contribuziun dalla vischnaunca possibilitescha medemamein alla Residenza Dulezi SA da pagar anavos il deivet hipotecar (*summa annuala: frs. 80'000.-*) alla banca. Plinavon eisi aschia era pusseivel da spisgentar in fond da renovaziun cun ina summa annuala da frs. 36'000.-. Ina part dalla summa (frs. 10'000.-) ei prevedida per las lavurs da manteniment che seresultan eifer ils onns vid igl object e l'ulteriura cumpart (frs. 26'000.-) per l'emprema sanaziun che ha liug en rodund 30 onns. Ils daners destinai per la sanaziun vegnan pagai sin in conto special. Pil mument muntan ils deivets dalla Residenza Dulezi SA a frs. 7.5 milliuns. Quels vegin nus da sminuir tochen en 30 onns sin rodund frs. 5.1 milliuns.

A caschun dalla tractaziun dil project il 2017 havevan ils responsabels previu da scriver giu igl object sur in spazi da 80 onns, aschia che las amortisaziuns eran pli bassas. La decisiun da scriver giu igl object sur 50 onns ha per consequenza che las amortisaziuns s'augmentan. Il surpli da cuosts da frs. 1'400'000.- tier la construcziun digl object ha medemamein procurau per in augment tier las amortisaziuns.

Ei fuss era pusseivel da desister sin la contribuziun dalla vischnaunca. Sche nus persequitein denton quei scenari, eisi da quintar che la Residenza Dulezi SA ha en 30 onns negins daners avon maun per far las renovaziuns necessarias. Culla contribuziun dalla vischnaunca vul il cussegl d'administraziun cuvierer d'ina vart las amortisaziuns. Da l'autra vart vulein nus metter d'in maun mieds liquids (*fondo da renovaziun*) sin in conto da banca special per cheutras segirar la finanziaziun dalla sanaziun digl object per pli tard. Nus vulein numnadamein buca adossar buordis finansials alla generaziun precedenta. La garanzia ei gia valeivla naven digl onn da gestiun 2020.

Tier las entradas ed expensas havein nus buca grond spazi. Ils contracts d'affittaziun ein stipulai. Nus vulein porscher habitaziuns modernas per in prezi pagabel, aschia ch'igl ei buca previu d'adattar ils tscheins d'affittaziun. Tier las expensas setracta ei per gronda part da cuosts fixs, nua che nus havein buca grond spazi da ils reducir ils cuosts.

Surtut ora ei la Residenza Dulezi ina buna purschida. Igl uffeci competent ha concediu igl atun vargau la lubientscha pil habitar assistiu. Nus havein engaschau duas dunnas ch'ei responsablas pil survetsch da survigilanza ella Residenza Dulezi. Il menaschi funcziunescha detg bein. La vischnaunca vegn pli probabel mai a contonscher in tal gudogn che possibilitass era da far las reservas per las sanaziuns digl avegnir. Autruisa stuein nus sededicar ad in niev concept da menaschi. Tenor miu meini setracta ei d'in object modern che corrispunda als basegns dils affittaders.

Discussiun generala:

Vigeli Giossi, vischin da Rueras:

Cura ch'jeu hai legiu il messadi sundel jeu staus empauet surstaus davart las cefras. Ils fatgs ein vegni presentai bein el messadi, in compliment persuerter. Daco ein cuosts supplementars ella summa da frs. 1.4 milliuns seresultai tier il project? Savein nus veramein ir da quei anora che las entradas stattan sur ils proxims 15 onns adina sin il medem nivel?!. Tenor miu meini san las entradas era svariari.

Martin Cavegn, president communal:

Las lavurs dil contuorn e la construcziun dalla garascha han caschunau quels cuosts supplementars. Ultra da quei ha il cussegl d'administraziun decidiu da baghegiar ora supplementarment ella Residenza Dulezi duas habitaziuns da 2.5 combras. Quei ha medemamein caschunau in augment tier ils cuosts.

Ils contracts d'affittaziun ein serrai giu. Tier las entradas havein nus aschia buca la pusseivladad da far adattaziuns a cuorta vesta. Ei sa denton adina capitar che certs contracts vegnan abdicai. Ils affittaders e la Residenza Dulezi SA han il dretg d'abdicar il contract d'affittaziun cun risguardar in temps da visada d'in meins. Nus vulein porscher in tscheins pagabel als affittaders, aschia ch'in augment pli grond vegn buca en damonda. Jeu vi denton explicit menziunar che las entradas ord ils tscheins d'affittaziun tonschan pil mument buca per cuvierer ils cuosts dalla casa. En quei connex san ins per propi tschentari la damonda, schebein la vischnaunca ei cantlia da curclar ils cuosts supplementars cun ina contribuziun annuala.

Votaziun:

La radunonza da vischnaunca conceda cun 47 vuschs (gie) encunter 0 vuschs (na) (9 abstenziuns) ina garanzia annuala da deficit (rodund frs. 100'000.-) per mauns dalla Residenza Dulezi SA.

La garanzia ei valeivla naven digl onn da gestiun 2020.

4. Tractanda Lescha dalla vischnaunca Tujetsch davart susteniments finanziels per interpresas pertuccadas dallas prescripziuns relaschadas en connex cul coronavirus

Presentaziun dalla tractanda entras Martin Cavegn, president communal:

Il coronavirus accumpogna nus gia dapi entgin temps. Plirs luvriers ein pertuccai dallas restricziuns en connex cul virus e retscheivan aschia sulettamein 80% da lur paga (*indemnisaziun per lavur cuorta*). Sper quellast prestaziuns ei in pachet cun prestaziuns per cass da direzia vegnius lantschus. Las interpresas che han registrau silmeins 40% pli paucas entradas, retscheivan in'indemnisaziun ord quei pachet. Quell'indemnisaziun cuviera denton mo 75% dils cuosts fixes dall'interpresa.

La supraponza communal vul era segidar cullas interpresas pertuccadas dil coronavirus a Tujetsch. Igl ei buca pusseivel da relaschar las taxas da hospis e turissem e las ulteriuras

taxas. Ord quei motiv havein nus relaschau ina lescha. La lescha ei la basa legala che possibilitescha alla vischnaunca da conceder credits da sustegn per las branschas pertuccadas dallas prescripziuns relaschadas en connex cul coronavirus. Oz va ei buca per conceder ils credits da sustegn, mobein la tractaziun dalla lescha stat el center dalla radunonza.

La lescha entra en vigur cun l'entschatta digl onn 2021 ed ei valeivla entochen ils 31 da december 2021, priu il cass che tala vegn approvada oz. La lescha preveda che la suprastonza communal suttametta ina damonda da susteniment per las differentas branschas als gremis cumpetents. La damonda ha da cuntener informaziuns dalla branscha pertuccada, il temps (perioda limitada pil susteniment), la cumpart dil susteniment, la summa dil credit da sustegn sco era ils documents e las indicaziuns che las interpresas dalla branscha pertuccada ein obligadas d'inoltrar alla suprastonza communal per l'examinaziun d'in eventual susteniment.

Cura ch'ils gremis cumpetents ha concediu il credit da sustegn, retscheivan las interpresas dalla branscha pertuccada la pusseivladad d'inoltrar ina damonda da susteniment. Il temps per l'inoltraziun dallas damondas vegn publicaus ella Tuatschina. L'examinaziun dallas damondas succeda entras la suprastonza communal sin fundament dalla lescha e las indicaziuns approbadas dils gremis cumpetents en connex cul credit da sustegn.

Discussiun generala:

Negina persuna pren il plaid.

Tractaziun dalla lescha:

Martin Cavegn, president communal:

Il cussegl d'administraziun dall'energia alpina ha era decidiu da conceder in sustegn finanziel, cura ch'ils gremis cumpetents han concediu ils credits da sustegn per las branschas pertuccadas.

Artechel 9:

Primus Deragisch, vischin da Bugnei e president dalla cumissiun da gestiun:

Las obligaziuns dalla cumissiun da gestiun ein regladas en in regulativ. Aschia eisi buca necessari da menziunar la cumissiun da gestiun en quei artechel. Ord quei motiv proponel jeu da strihar il plaid "cumissiun da gestiun" ord quei artechel.

Votaziun davart la proposta da Primus Deragisch:

La radunonza da vischnaunca decida cun 45 vuschs (gie) encunter 4 vuschs (na) (7 abstenziuns) da strihar il plaid "cumissiun da gestiun" ord igl artechel 9 dalla lescha.

Votaziun davart la lescha:

La radunonza da vischnaunca approbescha cun 50 vuschs (gie) encunter 0 vuschs (na) (6 abstenziuns) la lescha dalla vischnaunca Tujetsch davart susteniments finansials per interpresas pertuccadas dallas prescripziuns relaschadas en connex cul coronavirus.

La lescha entra en vigur cun l'entschatta schaner 2021 ed ei valeivla entochen la fin digl onn 2021.

5. Tractanda Visada dils contracts pertuccont il sittar ella Val Maighels

Presentaziun dalla tractanda entras Martin Cavegn, president communal:

La Val Maighels ei ina bellezza cuntrada. La Confederaziun e l'interpresa RWM SA han il dretg da sittar en quella vallada. La suprastanza communal ed il cussegl da vischnaunca ein dil meini da visar quels contracts da servitut (dretg da sittar) e nezegiar la val sulettamein pil turissem. Per l'ina savein nus buca tgei che capeta culla muniziun che vegn examinada en quella val. Per l'autra vegnan ils exerchezis da sittar menai atras duront la stagiun aulta, quei che vegn insumma buca d'engrau al turissem. Vitier vegn che la Confederaziun ei mo pli cantlia da pagar ina modesta cumpart vid ils cuosts da manteniment dalla via che meina enta Maighels. Las abdicaziuns dils contracts da servitut cun la Confederaziun e la RWM SA ha la suprastanza communal gia tarmess la fin december 2020, sut la resalva che talas ein mo valeivlas, sch'ils gremis cumpetents dattan il consentiment persuerter.

La Confederaziun ei pil mument vid analizar, schebein ei fuss pusseivel da menar atras ils exerchezis da sittar ella Val Nalps egl avegnir. Ei dat era contractivas arisguard la sanaziun dalla via che meina enta Nalps denter la vischnaunca, l'Axpo e la Corporaziun d'alp Segnas. La vischnaunca ei legitimada da far diever da quella via.

Ozildi eisi buca pli cunvegner da sittar ella Val Maighels, quei per l'ina ord vesta etica e per l'autra muort il turissem. Cun abdicar ils contracts spiarda la vischnaunca zuar entradas annualas da rodond frs. 52'000.-. Ils contractants havessen denton era adina la pusseivladad d'abdicar ils contracts. Igl ei pia aschia ni aschia buca pusseivel da segirar quell'entrada a liunga vesta.

Discussiun generala:

André Schmid, vischin da Sedrun:

Jeu hai capientscha che la suprastanza communal vul slijar quella situaziun arisguard "il sittar". Ei vegn sittau pauc ni nuot. Jeu hai damondas tier duas tematicas. Sch'il militar seretila enta Maighels: Tgei capeta allura cun l'infrastructura che vegn buca pli duvrada. Ei setracta dallas vias entuorn ils lags ed ils indrezs si Plidutscha. Ein il militar ed ils ulteriurs involvai obligai da baghegiar anavos quell'infrastructura?

Ina ulteriura damonda: Co preveda la suprastanza communal da nezegiar la via egl avegnir? Enviars la camona da Maighels regia in grond traffic che disturba medemamein il turissem. Sch'ins vul d'ina vart scumandar da sittar pervia dil disturbi fuss ei tenor miu

manegiar era indicau da restrenscher il traffic. Per tgi che sa far valer in interess (p.ex. ils miigiurs dalla camona da Maighels ni per l'alpegiaziun) duess ei dar lubientschas specialas. Per tut ils auters fuss ei prudent da scumandar da carrar enta Maighels.

Martin Cavegn, president communal:

L'interpresa RWM SA s'auda ad ina interpresa tudestga. Ils edificis e l'ulteriura infrastruttura sto vegnir baghegiada anavos. Sche las vias lateralas ston vegnir renaturalisadas saiel jeu pil mument buca dir. Jeu vegnel denton a sclarir giu quella caussa.

Nus havein tematisau il manteniment dalla via. La via ei cuntenida el concept da traffic. Ina varianta ei -> Tgi che fa diever dalla via, ei obligaus da separticipar als cuosts dil manteniment da quella. D'installar ina barriera ei ina ulteriura varianta. Puspei ina outra ponderaziun turistica ei che la val fuss accessibla cun in bus. Nus vegnin a s'aprofundar cun la tematica da rudien, co la via duei vegnir nezegiada egl avegnir e tgi che ei la finala obligaus da separticipar als cuosts dil manteniment da quella. Tut quels puncts vegnin nus a definir el concept da traffic.

Votaziun:

La radunonza da vischnaunca decida cun 48 vuschs (gie) encunter 1 vusch (na) (7 abstenziuns) da visar il contract da servitut cun la RWM Schweiz SA dils 30-07-1974 e da visar il contract da servitut cun la Confederaziun svizra dils 08-06-1979.

6. Tractanda Orientaziuns

Martin Cavegn, president communal:

Iniziativa: "Spindrar la staziun a Sedrun ed il transport d'autos cul tren sur il Pass Alpsu"

En tut han 734 personas suttascrit l'iniziativa. 351 suttascripziuns ein valeivlas. Dillas 383 suttascripziuns buca valeivlas, setracta ei da 356 personas senza il domicil a Tujetsch. La suprastonza communal ha examinau l'iniziativa e fatg persenn che tala ei buca valeivla. Sin fundament da quei fatg ha ella en concordanza cul comité d'iniziativa decidiu da tractar quell'iniziativa sco ina petiziun.

Nus havein giu dacuort ina seduta digitala culs responsabels dils uffecis da traffic dils cantuns Uri e Grischun e culs responsabels digl Uffeci da traffic federal. Il transport d'autos sur il Pass Alpsu vegn ei probablamein buca ad esser pusseivel da mantener vinavon. Sin fundament dalla relaziun denter ils cuosts ed il diember d'autos transportai selai quella purschida buca giustificar. Persuenter vegn la purschida dil traffic public engrondida. Igl ei previu da porscher in tren la damaun pli baul ed in tren la sera pli tard naven da Mustér entochen Andermatt ed en direcziun cuntraria.

La Regiun Surselva ha redeggiu ina resoluziun en connex cul transport d'autos sur il Pass Alpsu ed il traffic public. Quella pretenda l'introducziun d'in tact da mesa ura tier il traffic public naven da Cuera entochen a Dieni. Plinavon vegnan novas colligiazions denter Mustér

ed Andermatt pretendidas, quei la damaun e la sera. Sin fundament da quellas pretensiuns sperein nus che las colligaziuns e la purschida dil traffic public ella Surselva vegnien migliuradas. La finamira ei che la Viafier Retia cursescha entochen a Dieni. La realisaziun dalla Porta Alpina vegn actualmein sclarida muort in'incumbensa ch'ei vegnida inoltrada el Cussegl Grond. La schanza che quei project vegni realisaus ei denton pauc realistica tenor las explicaziuns digl Uffeci da traffic dil cantun Grischun.

Actualmein ei era la construcziun d'in tunnel da basa Andermatt-Dieni en discussiun. Nus essan obligai da far oz la politica per las proximas generaziuns. Las decisiuns che vegnan pridas oz, vegnan numnadamein pér realisadas en rodund 20 onns. Il tunnel ei pér previus ils onns 2040. Quei muossa con ditg che l'entira procedura politica cuozza. Nus stuein definir tgei che nus giavischein – quei ei era impurtont per pli tard.

Nus havein uss saviu far persenn che l'iniziativa ha mess en moviment bia a Tujetsch. La Viafier Matterhorn Gotthard haveva previu da spazzar l'ustria sco era il baghetg da menaschi. Ussa capeta quei denton buc. Il project per la sanaziun dalla staziun a Sedrun ei actualmein era en elavuraziun. Impurtont ei che la suprastanza communal porti en el rom da quei project ils impurtonts giavischs davart dalla vischnaunca.

Project - sanaziun dil Bogn Sedrun e novas purschidas

La cumissiun preparatorica ei vid elavurar la nova varianta per la sanaziun dil Bogn Sedrun che preveda supplementarmein novas purschidas. Ina ruschnera ordaviert ei planisada sco era in spazi da sedivertir endadens. La ruschnera vegn a caschunar cuosts da rodund frs. 1 milliun. Tut ensemen cuosta la sanaziun ed engrondaziun rodund frs. 9 milliuns. La suprastanza communal vegn proximamein ad inoltrar ina damonda da susteniment al cantun Grischun. Priu il cass che sulettamein ina sanaziun senza engrondaziun cun la ruschnera dil Bogn Sedrun vegn en damonda, eisi da quintar cun cuosts da rodund frs. 7 milliuns. Dacuort han las cusseglieras ed ils cussegliers decidiu a caschun d'ina votaziun consultativa ch'els giavischan da ver emprem enconuschientscha sur dalla contribuziun ch'il cantun metta a disposiziun pil project, avon che prender ina decisiun en caussa.

7. Tractanda Varia

Alfred Schmid, vischin da Sedrun:

Jeu sun dil meini che nus stuein per tut prezi realisar la Porta Alpina. Ei cuozza 20 tochen 30 onns avon ch'in project vegn realisaus sco il president communal ha menziunau. Tier la Porta Alpina ei l'entira infrastruttura denton gia avon maun. Quei project astgein nus buca dar si.

Jeu engraziel alla suprastanza communal per la ferma iniziativa. Jeu sperel denton era che quei mondi vinavon aschia. Ina tala dinamica fa grond plascher ad in e scadin e vegn era d'engrau alla vischnaunca.

Avon entgins onns havein nus decidiu da dar giu las aczias dallas anteriuras Pendicularas da Sedrun all'Andermatt-Sedrun Sport SA. Quei ei stau ina prudenta decisiun, sch'ins tila en consideraziun che la vischnaunca havess giu d'investar mintga dus onns circa frs. 1 entochen 2 frs. milliuns els indrezs. El contract da servitut ch'ei vegnius stipulaus da lezzas uras, eisi

perscret che la vischnaunca ha il dretg sin in representant el cussegl d'administraziun dall'ASS SA. Sillas vias hai jeu intervegniu che la vischnaunca seigi buca pli representada en quei gremi. La suprastonza communal ha denton mai informau en caussa. Daco fagein nus buca nez da quei dretg? Quei representant havess era ina certa peisa ed influenza sillas decisiuns. Daco tarmetta la suprastonza communal buca ina persuna ord siu miez el cussegl d'administraziun? Gest uss en connex cullas lavurs da planisaziun pil resort a Dieni fuss quei da grond avantatg. Daco ha la suprastonza communal buca informau ch'ella seretila ord quei gremi?

Martin Cavegn, president communal:

Culla resoluziun dalla Regiun Surselva havein nus mess fil en guila, quei era arisguard il project Porta Alpina. Ultra da quei ha la Regenza retschert in'incumbensa concernent quei project. Las necessarias stentas en connex cun la Porta Alpina ha la regiun pia fatg. Ussa stuein nus spitgar sin la risposta dalla Regenza arisguard l'incumbensa inoltrada el Cussegl Grond. Jeu engraziell a Martin Candinas, cusseglier naziunal. El segida nua ch'el sa e po e presta bia lavur en favur dalla vischnaunca Tujetsch e dalla regiun.

Era sche la vischnaunca da Tujetsch ei representada el cussegl d'administraziun, la pluralitad dallas vuschs ha aunc adina signur Samih Sawiris. La vischnaunca ha stipulau in contract da servitut cull'Andermatt Sedrun Sport SA. Quel scriva avon che l'ASS SA ei obligada da cumprar en victualias ella val. En connex cullas pendicularas savein nus tschentar la suandonta damonda: Tgei partenari giavischein nus? Tgei partenari duei la vischnaunca esser visavi las pendicularas? Jeu sun stediamein en contact cun Raphael Krucker, il directur dall'Andermatt Swiss Alps SA e Rainer Flaig, il directur dall'Andermatt-Sedrun Sport SA. Els schazegian la buna collaboraziun culla vischnaunca. Nus fagein comunablamein grondas stentas per ch'il resort a Dieni vegni realisau. Era el rom dallas contractivas per la carta da hosps havein nus ina buna collaboraziun cun las pendicularas. Jeu vi aunc inagada explicit menziunar che la collaboraziun cullas pendicularas ei buna, era sche la vischnaunca da Tujetsch ei pil mument buca representada el cussegl d'administraziun. Ils responsabels dall'ASS SA han empermess da cumprar en dapli a Tujetsch egl avegnir. Nus vegnin allura ad examinar pli tard, sche quei ei veramein il cass.

Alfred Schmid, vischin da Sedrun:

Jeu sun buca cuntents cun quella risposta dil president communal. El cussegl d'administraziun havess la vischnaunca dapli influenza.

Martin Cavegn, president communal:

Il cussegl d'administraziun sa sco per exempel prender influenza el rom dalla reducziun dils cuosts da menaschi. Quei vul dir oravontut tier la politica da persunal. Per exempel igl agir succedi en connex cun la situaziun dil coronavirus enviars ils conlucers sai jeu buca sustener. Las premissas ston constar per ch'in representant dalla suprastonza communal sa far part al cussegl d'administraziun e representar ils interess dalla vischnaunca. Jeu vi buca seser el cussegl d'administraziun e semplamein mo "dar il tgau". Tgi che enconuscha mei, sa s'imaginar che quei ei buca mia moda e maniera. La suprastonza vegn proximamein a prender ina clara posiziun enviars l'ASS SA e lu sa il representant era star en cumpleinamein

per quellas caussas. Ins sto saver ch'igl ei grev da saltar sin duas nozzas. D'ina vart ei mintga commember dil cussegl d'administraziun obligaus da representar cumpleinamein ils interess dall'interpresa (tenor lescha vertenta) e da l'autra vart stuess quella persuna era representar ils interess dalla vischnaunca. Cheutras seresultan en mintga cass conflicts d'interess.

Alfred Schmid, vischin da Sedrun:

Tenor il contract da servitut havein nus il dretg sin in sez el cussegl d'administraziun e fagein buca diever da tal. Quei ei buca gest fetg plascheivel.

Vigeli Giossi, vischin da Rueras:

Jeu hai ina damonda en connex culla Viafier Matterhorn Gotthard, ina buna patruna da lavur. Quella fa regularmein grondas investiziuns en nossa regiun. Sch'ins carrescha cugl auto naven da Cuera siadora, savein nus far persenn che la curva a s. Brida ei il mender liug. Vegn quei tschancun migliuraus proximamein? Inagada steva in tunnel naven da Putnengia entochen a s. Brida en discussiun. Forsa sa il gerau competent dar sclariment en caussa.

Guido Monn, gerau:

Il cantun ha inoltrau la damonda per migliurar quei tschancun. Igl atun entscheivan las lavurs vid il grep. Igl ei previu da spazzar ina part da quel. La curva avon s. Brida vegn slargiada, aschia ch'ils automobilists san carrar meglier sperasora. Il tunnel ch'era previus en quella vischinonza stat buca pli en discussiun. La Viafier Matterhorn Gotthard vegn a sanar il trassé existent. Quellas lavurs ein planisadas circa igl onn 2023.

Il president communal siara la radunonza da vischnaunca, engrazia per l'attenziun e giavischa a tuts in bien retuorn a casa.

Sedrun, ils 28 d'avrel 2021

Actuar:
Simon Collenberg

President communal:
Martin Cavegn